

Preparacionnan di Museo pa haya back coleccionnan arqueologico di Aruba

ORANJESTAD (AAN): Den cuadro di e maneho di Museo Arqueologico Aruba (MAA) riba conservacion di material y lugarnan arqueologico, e arqueologonan drs. R. Dijkhoff, drs. H. Kelly y asistente-arqueologo G. Angela di e Departamento Cientifico di MAA tabata na e 'Museo Nacional di Arkeologia i Antropologia' (NAAM) na Curaçao.

Den e siman di 7 pa 10 di Maart nan a inventariza e parti di e coleccion di material arqueologico di Aruba cu ta na NAAM. Esaki nan a haci como un preparacion pa asina den futuro Antiyas por entrega e material arqueologico aki back na Aruba.

Na aña 1983 'Rijksmuseum voor Volkenkunde' na Leiden a debolbe e coleccion di material arqueologico aki na Antiyas. E team di MAA a inventariza, registra y empaketa e parti di e coleccion di Aruba pa asina, pa medio di intervencion di NAAM y cu aprobacion di Conselho di ministronan di Antiyas Hulandes, e artefactonan di e coleccion aki bolbe Aruba pa tambe por



forma parti di e futuro exposicion di e Museo Nacional Aruba.

E coleccion aki ta encera artefactonan arqueologico valioso di excavacionnan cu a ser haci entre otro door di arqueologonan J. De Josselin de Jong (1923), H. van Heekeren y C. du Ry (añanan sesenta) y E. Boerstra (añanan setenta).

E material, di cual nobenta por ciento ta consisti di ceramica y diez por ciento ta consisti di herment traha di

piedra y cocolishi, ta procedente di e lugarnan arqueologico di e.o. St. Cruz, Savaneta y Tanki Flip. Esaki tabata un prome paso pa haya otro coleccionnan di Aruba back cu actualmente ta den exterior, por ehempel Venezuela, Hulanda y Curaçao, pa asina nan tambe forma parti di e futuro exposicion di Museo Nacional Aruba.

Ademas di e trabaoonan na NAAM, arqueologo, drs. R. Dijkhoff a duna un

presentacion na Universidad di Antiyas (UNA) tocante e tema Introduccion den Arqueologia. E presentacion aki tabata especificamente pa arquitecto, contratista, conseheronan y desaroyador di proyectonan di construccion y otro personanan cu ta traha den construccion. E meta di e presentacion ta pa personanan cu den nan trabao den construccion por encontra material of lugar

arqueologico sa con pa reconoce esaki y kico nan por haci den un caso asina.

E trabaoonan haci na Curaçao tabata un bon training pa e Departamento Cientifico di MAA cu entrante dia 30 di April lo cuminsa re-inventariza y documenta tur e coleccionnan di MAA. Esaki ta un preparacion necesario cu mester tuma lugar prome cu muda pa asina e transicion di MAA pa e Museo Nacional den e edificacion 'Ecury' den Schelpstraat bay mas eficiente cu ta posibel.

E re-inventarizacion y documentacion aki ta un trabao cu ta tuma hopi tempo, cu mester ser haci hopi cauteloso, y cu ta exige e debido espacio. Pesey MAA lo cera entrante 30 di April su sala di exposicion pa asina e Departamento Cientifico por haci uso di e espacio aki. MAA ta pidi publico disculpa pa e inconveniencia aki.